

天台山全志

天台山全志卷之三

楚郢張聯元覺菴輯

峰

華頂峰 在天台縣東北六十里寧海縣西南一百里  
新昌縣東南一百里天台第八重最高處舊傳高一  
萬八千丈周回八百里少晴多晦夏有積雪可觀日  
之出入中有洞石色光明登絕頂東望滄海瀾漫無  
際號望海尖下瞰衆山如龍虎盤踞旗鼓布列之狀  
草木薰郁殆非人世僧智顓與司馬承禎俱宴坐脩  
真焉有葛元丹井王羲之墨池李太白書堂台山峰

巒嶽嶺猶如蓮華此爲華心之頂故名

摘星峰 在華頂東北

柏香峰 在華頂西以多柏木故名四望陰崖垂磴萬

仞

通元峰 在華頂南僧德韶嘗卓菴於此

葛闌峰 在華頂南寒風闌之上長壽寺照山上有龍

潭亦多效靈

大雷峰 大慈寺主山東有蜜蜂洞

玉筍峰 在銀山頂號金箱玉印

白雲峰 在太平興國寺側

九折峰 在白雲峰東北五里智顛宴坐立場處

八桂峰 在國清寺正北 靈禽峰 在國清寺東北

祥雲峰 在國清寺東南 靈芝峰 在國清寺西南

映霞峰 在國清寺西北

以上五峰回環國清寺

明月峰 娑羅峰

香爐峰 以日出有紫煙故名

大舍峰 銅魚峰 藏象峰 煙霞峰 應澤峰

以上八峰回環萬年寺

臥龍峰 桐柏宮之側

玉女峰

紫霄峰

福聖觀前

翠微峰

玉泉峰

桐柏觀前

華琳峰

香琳峰

蓮華峰

狀似蓮華秀插雲漢在瓊臺西

玉霄峰

卽洞天宮主山重崖疊嶂松竹葱蒨且產香

茅直南巽隅兩石對峙如門扉號小桐柏陸游劍南

詩稿云予所領崇道觀在天台玉霄峰下舊有小閣

臨官道旁余得領玉霄閣仍爲詩云竹與衝雨到天

台綠樹陰中小閣開喚作玉霄君會否要知小吏接  
行來

以上九峰回環桐柏宮

雙女峰 迎陽峰 合翠峰

以上三峰在桃源

瑞雲峰 亦在桐柏觀前

金爐峰 在瓊臺之前有仙人座並葛元煉丹處

雲蓋峰 在方瀛山後

列秀峰 亦在萬年寺西

水澄西峰 僧普岸所棲按普岸從天姥入天台得平

川谷結茅居之構院號平田卽萬年寺也則是峰亦與萬年不遠。

瑞龍峰 與香爐峰應澤峰紫凝峰天柱峰相望均爲勝槩又名瑞龍巖巖下有龍名戲龍唐咸通間曾建有無相院名戲龍院

紫凝峰 因僧智顛誦經感紫雲之異故名

蘆峰 在淨慧寺前舊傳葛元植蘆於此下有蘆洋蘆坑

浙峰 在天台縣西五十里一作崑嶠又有匡嶠在天台縣東四十里胡嶠在天台縣西北四十五里俱見

范志

菡溪峰

在天台縣西五十里又名翠巖四面懸絕峰

頂坦平桃竹秀麗

大隱峰

未詳處所宋錢厚之建雙清堂於其下王銍

爲記

獅子峰

在石梁北出根子晉僧曇猷欲渡梁訪方廣

寺有石如屏梗之號蒸餅

菩提峰

大同寺後所謂菩提大同是也

小香爐峰

在金庭觀齊道士褚伯玉建

卓劍峰

五老峰 放鶴峰



以上四峰俱在嵯之金庭山

蓮華峰 在新昌沃洲山 菩提峰 在新昌與華頂

峰相接有石似佛故名菩提

石屏峰 在寧海縣西南蒼崖壁立潭瀨中

鹿頭峰 在寧海縣西與天台接

天女峰 在寧海縣北望之如髮女狀海中人望餘山

皆伏惟華頂與此峰屹立

巖

鑿字巖 上有萬松徑三字各廣八尺僧指堂書刻由

巖至國清兩行昔列大松今無

拾得巖 在國清寺

烏石巖 在赤城之南又名烏岡

龜巖 在闡法寺側三巖相連其上如一元至元中忽  
一日雷雨有聲轟然旦視其巖左脇橫裂闊十數丈  
深不可測

赤巖 在天台縣南一十里峭壁屹立如大屏其色丹  
赭號小赤城

響巖 在天台縣東七里

絹機巖 在丹丘山西

犀牛翫月巖 在丹丘山南

靈響巖 在高明寺幽溪之上峭壁百仞隨人呼喚響  
答甚明故名

香谷巖 在幽溪之上石如列屏前有隙地方丈許周  
植衆木前種修竹數百竿多生蘭蕙故名

巾子巖 在幽溪之背白雲峰南有石正方如巾上拂  
霄漢下連磐石纔數尺許流雲乍過其上恍然天柱  
欲倒

觀音巖 在螺溪之側冠綏瓔珞於蒼翠中宛然一普  
陀大士

石筍巖 在螺螭潭上根入潭水數十丈尖銳如筍多

生莓苔及生卷柏蒙茸披離又如紫籜之將解

隱巖 在神蹟石東

麻姑巖 在天台縣東南二十五里一名仙姑巖

翠屏巖 在天台縣南二十五里有龍湫志要云山形  
壁立如屏風然故名遠望山勢中立如案兩端略起  
似展誥軸又名展誥屏

獅子巖 在繫船山北口呀然如獅子故名下臨小溪  
險峻不可陟特可仰視有石棺石櫃石爐之屬巖下  
有竅日初出時光入隙中謂之日窗東望小亭翼然

卽龍祠

曹家巖 在天台縣西三里

大小石鎖巖 在福聖觀西甚峭峻

隱身巖 在桐柏觀之側

百丈巖 在桐柏觀西北與瓊臺相望峭險東隘四山

牆立下爲龍湫翠蔓蒙絡水流聲淥然磬澗繞麓入

爲靈溪北望石如張頤亦號獅子巖有石牀可盤踞

白郎巖 齊僧普遼自遼東憩此事載白巖寺唐時天

台令白餘豐禱雨輒應王展有記

寶陀巖 羅漢巖 二巖與舊無相院之瑞龍峰相望

靈巖 巖洞虛迥有石如案與浙嶠山相連中有小嶼

號曰文嶼左右魚石盤列映帶

合掌巖 在明巖寺

題字巖 在沃洲山

嶺

顧儒嶺 在天台縣東南十五里舊名東岬有顧歡讀書堂故址後人因以爲名今嶺傍有歡溪歡輿且有顧姓居之或其苗裔也

山隍嶺 在顧儒嶺東十五里

黃振嶺 在山隍嶺東十里與臨海分界范志作王進嶺謂宋高宗嘗從此嶺進幸周氏宅題詩於壁云秋

入幽巖桂影團芳心日夕照林丹應知月窟天香種  
染得朝霞下廣寒後人因以名嶺舊志以高宗止至  
章安鎮而回未嘗至天台或係宗室大臣避亂者作  
興化嶺 在黃振嶺東北五里

筋竹嶺 在黃振嶺東北十里與寧海分界

幽溪嶺 在高明寺傍

智者嶺 僧智顛注涅槃經處有卓錫泉

魏嶺 在天封寺後舊產茶

招隱嶺 在華頂東南十里昔顧歡招同郡人杜京產

隱此

金地嶺 在國清寺北十里招手巖下

銀地嶺 與金地嶺接卽定光示智顛處

八桂嶺 在華頂東南孫綽所謂八桂森挺以凌霜是也

察嶺 在華頂南漢高察隱處有讀書堂故址

羅公嶺 在華頂東北六十里

摘星嶺 在華頂東北四十里

猢猻插嶺 在慈聖寺東大同寺西險峻難可登陟故名

會墅嶺 在關嶺北三十里新昌縣南五十里有會墅



村

藤公嶺 在萬年寺西十里西北至會聖嶺二十里

羅漢嶺 在萬年寺東南十里嶺有巨杉

盤來嶺 在天台縣西北五十里

王會嶺 在天台縣西北五十里

關嶺 在天台縣西北四十五里與新昌分界

桐柏嶺 在赤城山北十里嶺上有善利亭有石曰泉

注其中久旱不竭

洞天嶺 在桐柏嶺西北十五里

伏虎嶺 在天台縣西一十五里

白水嶺 在天台縣西二十里

大嶺小嶺 在秀溪 俗諺云十里橫沿九里阮大嶺  
小嶺在中央

斜嶺 在天台縣西四十里

石壁嶺 在天台縣西四十五里

孟湖嶺 在寒巖東十里過此嶺卽見三峰崛起爲寒  
明兩巖

黃山嶺 在天台縣南十里

黃壇嶺 杜潭嶺 俱在天台縣南二十五里與臨海  
分界

溪

開溪 源出察嶺

雙溪 在西安隱寺前

秀溪 源出萬年寺前

桐溪 源出桃源洞一作銅溪

惆悵溪 源出桃源

玉女溪 一名女梭在桐柏觀前名女梭福地發源自

洞天山過女梭洩爲瀑布下入靈溪

靈溪 福聖觀前孫綽賦所謂過靈溪而一濯是也又

天台縣東三十里亦曰靈溪有靈溪館舊時驛路由

靈溪至郡宋元祐中羅提刑適改自橫山出小石嶺  
以達於郡館遂廢

青溪 源出洞天山天台山南流至桐柏又南流經三  
井洩爲瀑布流入靈溪與左溪秀溪及桃源之水匯  
入青溪謝靈運登臨海嶠詩云旦發青溪陰唐元宗  
詩青溪阻逸人皆青字俗作清字誤

南嶽溪 源山寒風闕會於國清溪

國清溪 自佛隴山南流至神蹟石會於大溪

神蹟石溪 俗名白鶴溪接國清之水一入臨川橋一  
入孝義橋俱會於大溪

赭溪 在臨川橋北俗名後堂溪自神蹟石流臨川橋以達大溪以其溪皆赭石故名夏赤城鐵見霞亭實臨其側

檣溪 孫綽賦濟檣溪而直進又杜甫詩云饑拾檣溪椽徐靈府記注源出華頂從鳳凰山東南流入溪則得名舊矣又以齊顧歡嘗居其上名歡溪志要云歡溪與靈溪諸水合流而入大溪

天台大溪 源出東陽縣界大盆山合寒明兩巖鷓鴣諸山溪壑及桃源青溪靈溪諸流匯合過東橫山址透迤而東至鳳凰山側又會寶華之源五百靈溪歡

溪等水於大覺寺山麓折流而南至臨海入三江以達於海

響山溪 源出響巖流入大溪

幽溪 源出大慈山流入螺溪

螺溪 發源自黃壇潭一名折溪

乾溪 在天台縣南一十五里舊傳僧曇猷飛錫救老嫗溪水立涸故名

界溪 在天台縣東四十里與寧海分界源出龍鳴山流入寧海界

小驚溪 源出寧海之桐柏山

東桐柏

寧海東溪 源出屈母山北流三十里入寧和溪

寧和溪 源出天台及屈母山在寧海縣南七十五里

上白溪 俗傳狐嘯溪源出天台華頂東北八十里會

寧海大溪由雙港渡東流入海

湖濱溪 源出天台會雙港渡

水母溪 摘星嶺南源自華頂入寧海界

福溪 在華頂西南四十里晉束皙啓蒙記云天台山

去人不遠路經福溪水險而清蓋是時已有此名矣

其流西入於剡

羅木溪 羅公嶺南源出華頂流入剡

磐陀石 在天封山

神蹟石 在國清寺南石上有大人跡

聖蹟石 在大雷峰後三石如品字下二石如僧雙履  
俗稱仙人鞋

五百羅漢石 在五百相傳五百羅漢自西天泛海至  
此船與衆物皆化爲石故有覆船山蓮華鉢錫之類  
歷然可指隔溪小山有三石洞如龕室皆可脚踏

神仙趕石 在萬年寺西北



天台山全志卷之四

楚郢張聯元覺菴輯

物產

黃精 味甘氣平補中益氣除風濕補五勞七傷久服  
輕身延年白香山貽天台鄭隱君詩有黃精花未茸  
之句山中人九蒸九暴而食之博物志云太陽之草  
名黃精餌之可以長生太陰之草名鈎吻入口卽死  
蓋野葛之別名也盧氏註曰陰精黃精不相連根苗  
獨生者是也又曰鈎吻草與苕華相似採者辨之

青精 道士鄧伯元受青精石飯之法上元寶經云子

服草木王氣與神通于食青燭之津命不復殞陶隱  
居登真訣注云青精石飯以南燭草木煮汁漬米爲  
之

苣勝子 卽胡麻也可作飯昔劉阮入桃源仙女飯以  
胡麻卽此

橡斗子 卽櫟樹子莊子狙公養猿朝三暮四卽此物  
也實可爲粉秋末山間人採之水漬一月灑乾去其  
殼復漬月餘然後磨濾去滓水停成粉爲山中佳品  
或云可愈痢疾僧智顛與慧綽曾種苣拾橡

黃獨 俗稱毛團根與子皆可餐年愈久而根實愈大

不費耕鋤 潘耒詩 巖頭老僧日一粥覆眼蒼睂  
面如玉更無一事到胸中閒掃藤花拾黃獨

芋 卽蹲鴟昔高僧居山惟種芋三百六十本日餐其  
一不游人間因之得道

蕨 土名蕨雞以初生狀如雞拳故名苗可煮食根可  
爲粉山中人於秋冬間漫山開掘停漉爲粉或作麩  
或蒸炙爲餅明萬曆間天台失稔鄉人攜妻子入山  
採蕨度荒者不計其數 元性來打蕨歌 落日溪  
干人打蕨千槌萬槌碎筋骨待哺只恐下手遲隨風  
空谷傳聲疾破盡青山幾片雲淘殘秋水一團月寄

語兒童莫啼饑澄來蕨粉白如雪忙忙罄取入筐歸  
不飽朝餐心轉咽安得普天大有年鼓腹高歌牕下  
眠四鄰田父日招飲買醉不用青銅錢

筍 有數種 潘耒詩 多年不茹葷一飽甘葵藿本

欲淡滋味寧復論佳惡茲辰食燒筍過美非意度嫩  
如荔新剖脆若藕初削甘芳無畱滓軟美不煩嚼獨  
烹謹火候至味謝鹽酪乃知下方人所啖皆糟粕雜  
和分肴蔬坐令真味薄山僧遇居士作此慰寂寞不  
供肉食人恐損其脂膜願作台山農長年分此樂只  
愁一箸餐減却千林籜

薯蕷 一名山芋益氣長肌久服輕身不饑延年台山

處處有之藤葉如家植薯藥而小野人謂之上諸

山藥 出華頂

孟菜 處處有之華頂最多有油菜孟火棍孟犁頭孟  
藤孟山中僧俗於二三月競採爲乾清涼無毒可愈  
痢疾多食不傷胃苦行沙門賴此當煑石之供

蕈 萬年山出合蕈土人珍之多暴以致遠

茶 按陸羽茶經台越下注云生赤城山者與歙同桑  
莊茹芝續譜云天台山茶有三品紫凝爲上魏嶺次  
之小溪又次之紫凝今普門也魏嶺天封也小溪國

天台山志 卷之四 三  
清也而宋公祁答如吉茶詩有佛天雨露帝苑仙漿  
之語盛稱茶美而未言所出之處又寧海茶山昔以  
爲在日鑄之上

泉 陸羽茶經以天台瀑布泉爲天下第十七水

醴泉 在桐柏觀衆妙臺下水甘可以愈疾

甘露 葛洪煉丹天台有慶雲甘露之瑞

木 有蒼白兩種台山皆有之總以野木爲佳又有紅

木貫休詩黑壤生紅木是也一名山精神農經曰必

欲長生當服山精

萑蒲 一名萑陽一寸九節食之可以長生羅浮山萑

蒲一寸十二節台山一寸九節一寸十二節者甚多  
五日九日採如法製之多服益人聰明又生石鏵者  
曰石菖蒲葉細生波澤者曰水菖蒲葉微大

仙茅 一名香茅出天台洞天宮者最勝傳云手劬乳  
石不如一劬仙茅言其功力也

茯苓 松脂入地而生傍根者爲茯神

根子 出天台蒸餅峰後向東者佳今貨者多國清天  
封所產故不能愈疾

元參 陶弘景云道家用元參以合香

茱萸 似椒而淺青色者曰山茱萸粒多而黃黑者曰

吳茱萸又有一種紫色九日人取以泛觴

白芷 卷柏 稀蒼

椒 紅色香勝蜀椒舊傳賈偉爲漢中守攜其種歸種  
之

何首烏 赤者雄白者雌本名交藤服之髮白更黑或  
云雄淡白雌微赤唐李遠云此仙草也五十年者大  
如拳餌之一年鬚髮返黑百年者大如椀餌之一年  
齒落更生二百年者大如斗餌之返老還童追及奔  
馬三百年者大如栲栳中有鳥獸山嶽之紋號爲山  
精純陽之體久服且成地仙



艾 盃午前一日收其葉以製藥惟鳳皇山所產艾草  
入藥最佳

百藥祖 黃寮郎 催風便 石南藤 含藤 清風  
藤 耆婆藤 天壽藤 百稜藤 紫葛 千里急  
烏藥

右十二品按本草皆出天台

芝 許邁云天台臨海山多有仙人芝草耳目記亦云  
赤城山頂有青芝二根孫綽賦五芝含秀而晨敷謂  
赤芝黃芝白芝黑芝紫芝也餌之可以長生又有六  
芝神農經曰上藥養命謂玉石之鍊形六芝之延年

蘭 每幹一花而香濃者曰蘭五七花而香薄者曰蕙  
觀音草 生山谷中以盆盛清水沙石植之則青著泥  
則萎夏簇詩西來小草異蒿蓬天地生時別有工怪  
見著根泥土上只須水石養青藜

仙人掌 生石壁上如掌

長生草 卽仙人掌蘭素花多香生山巖及古樹中  
取而空懸之曝以日經年不槁

生卷柏 生石上土人謂之萬年松曝之葉卷得水葉  
舒雖藏於箱篋經年猶有生意

芭蕉

玫瑰花 鴛粟 蜀葵 牡丹 菊 雞冠 薔薇

拒霜 一名木芙蓉

凌霄花 附木蔓生或清晨仰視花露滴目則能喪明

辛夷 一名木筆花

繡毬 玉蘭 一曰望春花 酴醾 梔子 一名簪

菊花

木槿 一名舜花

海棠 紫薇 紫荆

鶴翎 一名娑羅樹花在石橋東五月開花非常奇異

一云出華頂峰以多經風霜樹不高大樹數百枝經

冬不凋花如芍藥香如茉莉雅州瓦屋山產娑羅花  
有五色映照山谷與此相類 徐大受詩 九葩一  
萼鶴翎紅開後梅黃煙雨中千葉青蓮無路到不知  
春在石橋東

杜鵑 俗號映山紅 一曰紅躑躅 王荊公詩所謂亦見  
舊時紅躑躅是也 又有一種紫色 唐貞元中僧自天  
台鉢中以藥養其根種鶴林寺 或見紅裳女子游花  
下俗傳花神卽此花也 道近石梁杜鵑高二三丈許  
二三月間遍山開放如桃花如紫薇絢爛奪目 張  
聯元詩 翠岫從容出名花次第逢最憐紅躑躅高

映碧芙蓉琪樹應同種桃源許竝穠無人移上苑空  
置白雲封

山礬 一名鄭花台山處處有之黃山谷云江南山野  
中有一種小白花木高數尺春開極香野人謂之鄭  
花王荆公嘗欲作詩而陋其名子請名曰山礬野人  
採鄭葉以染黃不借礬而成色故名曰山礬又名瑒  
花又名玉蘂花高齋詩話云唐人王建題唐昌觀玉  
蘂花詩一樹瓏鬆玉刻成飄廊點地色輕輕女冠應  
覓香來處惟見堦前碎月明

巖桂 紅者號丹桂黃者曰木樨

月桂子 陸龜蒙詩注宋紹定間舒岳祥童卯時夜課  
讀書會中秋月色皎然聞瓦上聲如撒雹其祖拙齋  
啓門視之乃曰此月中桂子也我嘗得之天台山中  
呼童子收可二升其大如豫章子無皮色如白玉有  
紋如雀卵其中有仁嚼之作芝麻氣味囊之雜菊花  
作枕其收拾不盡散落磚罅者旬輒出樹葉柔長經  
冬猶在

桃李

杏 舊傳天台山有六出五色者號仙人杏

梅 銀杏 枇杷 橘 橙 柚 櫻桃

林檎 本名來禽

棗 安石榴 栗 本草栗注云剡及始豐皮薄而甜

相傳有人病足至樹下食數升卽能起行又一種小者號茅栗山中人稱羅漢果樹不高只三四尺遍山皆是枝葉花果同於家栗但大小異耳善採者日可斗許或易米或曝作乾糧亦山居住佳品也

柿 有紅綠烏黃數色及牛妳八稜無核丁香等種

梀 形似柿青黑色一名綠柿

菩提樹 舊惟東岬有之相傳爲西天梵僧遺此種樹如柿花亦相似未結藥時先別抽一葉長指半闊兩

指色白而光潤乃結藥於葉下日則覆子以蔽日夜則捧子以承露秋社後取子爲珠必有一二如羅漢者謂之佛頭他處所產則無之山寺皆接種焉

琪樹 孫綽賦云琪樹璀璨而垂珠李善注云仙都所產未言其狀也至唐人詩詠始盛李紳詩云石橋峰上棲元鶴碧澗巖邊蔭羽人水葉萬條垂碧實玉珠千日保青春月中泣露應同色澗底侵雲尚有塵徒使伏根成琥珀不知松老化龍鱗自注云垂條如弱柳結子如碧珠三年子乃一熟每歲生者相續一年綠二年碧三年者紅綴條璀璨錯相間此言其狀也許



渾亦有月明琪樹陰之句

金松 按唐李德裕賦序云于顏太師猶子舊宅觀奇木枝似檉松葉如瞿麥訪其名曰金松得于台嶺故爲之賦其略云風入葉而成韻露垂柯而流液含春靄而葱菁映夕陽而的縈疑翠羽之羣翔笑金渾之旁射亦猶處子在於隱淪奇材遺於山澤

羅漢松 蒼翠可愛葉如翦刻狀如綠玉結實如羅漢故名

怪松 在資福寺大數圍高不四五尺枝葉翔翔於水面狀如舞鳳根株盤屈於巖畔形類盤龍明萬曆癸

已爲谿水摧壞寧海梁王寺亦有偃松極怪 陸龜  
蒙怪松圖贊并序 有道人自天台來示余怪松圖  
披之甚駭人目根盤於巖穴之內輪囷偃側而上身  
大數圍而高不四五尺礪砢然蹙縮然幹不暇枝枝  
不暇葉有若龍變虎跛壯士囚縛之狀道人曰是何  
物怪之如是耶子能辨之乎予曰草木之生安足怪  
耶苟肥瘠得於中寒暑均於外不爲物所凌折未有  
不挺而茂者也况松柏乎今不幸出於巖穴之內脞  
脆者則磴然其牙伏死其下矣何自奮之能爲是松  
也雖稚氣初折而正性不辱及其壯也力與石鬪乘

易之威悲已之軋卒不勝其壓擁勇鬱漫空憤激訄  
然後大醜彰於形質天下指之爲怪木吁豈異人乎  
哉天之賦才之盛者蚤不得用於世則伏而不舒薰  
蒸沉醉日進其道權擠勢奪卒不勝其阨號呼呶擊  
發越赴訴然後大奇出於文彩天下指之爲怪民嗚  
呼木病而後怪不怪不能圖其真人病而後奇不奇  
不能駭於俗非始不幸而終幸者耶道人曰然爲我  
贊之贊曰松生陰隘巖獄穴械病乎不快卒以爲怪  
擁腫支離神羞鬼疑道人嗟咨援筆傳奇或怪於形  
或奇於辭日爲怪魁是以贊之

松 石橋舊多古松唐人詩云畫松一如真松樹待我  
尋思記得無曾在天台山上過石梁橋畔第三株

杉 赤城舊志云羅漢嶺有巨杉偃蹇絜之大百圍凡  
供五百大士必於此嶺邀請

梧桐 烏柏 實可壓油作燭

黃楊 歲長三寸遇閏則縮一寸

楓 脂可爲香名山略記云天姥山有長楓千餘尺

連理木 唐皮日休送從勉遊天台山詩有行過石樹

凍無煙之句注云消山有石連理木消山卽赤城山  
也又宋紹興十七年有連理木生於天台山闍法寺

楓榆共幹三分三合其時游客以詩屬曾守去父有  
政成不用中和頌看取春郊連理枝之句曾因作頌  
以獻於朝

班竹 紫竹

筓竹 生二三月爲早筓其皮暴乾可照夜生四五月  
者稱晚筓 箭竹 會稽竹筓是也

桃枝竹 篠竹

茅竹 徐廷筠詩 不論臺閣與山林愛爾豈惟千畝  
陰未出土時先有節便凌雲去也無心葛陂始與龍  
俱化嶰谷聊同鳳一吟月朗風清良夜永可憐王子

獨知音

方竹 以莖方故名出天台玉霄峰可爲杖唐李德裕  
得一方竹杖贈潤州甘露寺僧後見僧問曰方竹兄  
無恙否對曰已規而漆之矣公嗟惋良久吟詩曰削  
圓方竹杖漆却斷紋琴

佛面竹 北山間有佳者可作杖

萬年藤 出華頂可爲杖 皮日休華頂杖詩 金凌

仙樹杖道客自攜持探洞求丹粟挑雲覓白芝量泉  
將濯足闌鶴把支頤以此將爲贈惟君盡得知 陸  
龜蒙詩 萬古陰崖雪靈根不爲枯瘦于霜鶴脛奇

是墨龍鬚拄訪元談客持看潑畫圖湖雲如有路竝  
可到仙都 王蔭東詩 萬年之山隔煙層山中仍  
長萬年藤此藤砍來供倚杖竒怪宛作龍蛇騰尋常  
掛素壁似有風雨生興來曳階下乍聞鏗然聲前年  
山僧遠相寄謂予足蹇仍防躓嗟爾相從亦已久如  
今病愈還輕棄昨者因出天台山無數苾芻競爾芟  
爲話出家須藉此一條還帶兩經函藤乎藤乎爾生  
只解掛獼猴何得從人作遠遊歸來兀坐對吾杖拂  
拭塵埃轉惆悵

花乳石 產寶華山色如瑤瑁丹者如霞青者如黛李

德裕謝寄石詩聞君采奇石剪斷赤城霞宋林逋謝  
天台僧寄石枕詩斷石自何許枕之懷赤城皆謂此  
也鑊爲杯斝并圖章等物俱瑩潤堅潔可愛

猿 貫休詩黃猿領白兒許渾詩鐘盡隴猿鳴指台山  
也又有金絲猿天台游考云金絲猿隱石梁間見者  
大貴

猴 舊傳大曆中有猴數百集寧海山林中里人伐木  
欲殺之有一老猿飛出縱火薰其屋於是人走救火  
猴得脫去其黥如此

鹿 宋靖康元年寧海縣峽溪忽有鹿高四尺餘莫知



所從來遇驅逐則跪而請命中箭死時有黃朝宗者  
館其處夜夢有人持牘相召至一所見老道士白鬚  
穆穆垂至腰云小人何知余養此鹿五百載今爲所  
殺聞子獲其麀幸見還視其左扉有司馬子微四字  
遂寤時村民旣殺鹿有周堯者截其尾以遺朝宗後  
朝宗百餘歲乃卒

青羊 虞洪常見於紫凝山

麕 兔

麕 似小蝙蝠 松鼠 尾小 栗鼠 尾大一名麕  
鼯鼠

竹飈 凡竹刺入肉不能出者用此物立消以其食竹  
故能化竹毒

仙鼠 在石孔中食諸乳石大如鳩鵲仙經所謂肉芝  
是也

金雀 石梁方廣梵唄方作有金色鳥飛翔林石  
搗藥鳥 以其音丁當似之

布穀 百舌 伯勞 鶉鵒 鳩 黃鸝 一名倉庚  
俗云黃鸞

雉 竹雞 自呼泥滑滑 白鷓 畫眉 啄木

蜂 有蜜蜂沙蜂山蜂數種

鐵 出猶溪今無

玉版紙 蘇文忠雜志云呂獻可遺予天台玉版過於  
澄心堂

天台山全志卷之五

楚郢張聯元覺菴輯

宮觀

桐柏宮 在桐柏山唐景雲二年爲司馬承禎建回環  
有九峰宮當其心自福聖觀北盤折而上至洞門一  
望佳景豁然道書云桐柏金庭洞天卽王子晉所治  
中有三橋一見二隱木則蘇珥琳碧泉則石髓金漿  
人得食之後天不老真誥云吳有勾曲之金陵越有  
桐柏之金庭三災不至洪波不登實不死之福鄉養  
真之靈境吳赤烏二年葛元於此煉丹齊永嘉元年

將軍沈約一千餘人棄官乞爲道士居之唐睿宗景雲二年敕爲承禎置觀號桐柏方置堂時有五色雲見唐史記以爲祥禁封內四十里無得樵採五里不許遷葬徐靈府小錄煉師所居黃雲常覆其上故有黃雲堂元晨壇煉形室鳳軫臺朝真壇朝斗壇龍章閣又有衆妙臺以篆隸八分三體寫道經於巨幢置臺上故名堂下有醴泉極甘可以愈疾元和中道士馮惟良又構降真堂白雲亭脩閑亭上清室太和咸通間道士徐靈府葉藏質新之元稹劉處靜爲記五代梁開平中改桐柏宮周廣順二年朱霄外建藏殿

宋大中祥符元年改桐柏崇道觀政和六年又於後山建元命殿一如宮制瓦用青色琉璃於梭溪上建二橋橋上構會仙亭直南嶺表建洞門一座內則方丈齋堂雲堂土地堂三真殿又有上清閣御書閣闕三朝宸翰及高宗所臨晉唐帖紹興二十二年楊和王存中重建三清殿曹開府勛建三門曹又於觀北結菴賜號冲嗇宮中爲院六一曰經藏二曰三元三曰延賓四曰清虛五曰白雲六曰浴院屢朝宣賜則有宋太宗真宗御書共五十三卷祥符中御衣四事高宗史漢事實翰墨志用高麗僧統所織成經簾二

帙裏吳越國王所捨銅像天尊一十身連金銀銅所  
鑄火燄臺座檀香三清像一龕計二百六十身玉花  
八株銅三清像金銀字經二百函睦親宅昭成太子  
宮聖蹟四十軸歷代珍襲供奉至明初蓮火化爲丘  
墟惟檀香像一龕存焉洪武中道士金靜觀提點吳  
惟敬相繼營建永樂十年道紀鮑了靜又加新之今  
俱廢 唐睿宗賜司馬承禎置觀敕台州始豐縣  
界天台山廢桐柏宮墓一所自吳赤烏二年葛仙翁  
已來至於國初學道壇宇連接者十餘所如聞始豐  
縣人毀壞壇場砍伐松竹耕種及作墳墓於此觸犯

家口死亡不敢居住於是出賣宜令州縣准地畝數  
酬價仍置一小觀還其舊額更於當州取道士三五  
人選擇精進行業者併聽將侍者供養仍令州縣與  
司馬煉師相知於天台中辟封內四十里爲禽獸  
草木長生之福庭禁斷採捕者景雲二年十月七日  
元明宮 在桐柏觀東北徐靈府小錄云由桐柏北上  
一峰可五里許唐長慶元年靈府定室於此寶曆元  
年賜號方瀛宋大中祥符元年改元明宮今廢

洞天宮 在玉霄峰上唐咸通五年道士葉藏質創道  
齋號石門山居十三年奏爲玉霄宮周廣順元年朱



霄外建三清殿徐靈府小錄云道士陳寡言嘗隱於  
此號華琳有經鐘二樓經皆咸通十一年書宋祥符  
元年改洞天宮有禹鐘高二尺狀如鐸上有隱文又  
一大鐘漢乾佑三年鑄今廢

仁靖純素二宮 在桐柏左右元至正間桐柏道士王  
足菴遇世祖宣授仁靖純素真人遂於其右舊白雲  
觀基建純素宮又於其左曹開府冲齋菴建仁靖宮  
今廢

福聖觀 在桐柏山南瀑布巖下赤烏二年爲葛元建  
初號天台觀其觀額乃元飛白書王右軍極贊之東

北連丹霞洞有仙人拍掌巖西北枕翠屏上有二井  
號三絕之一洩爲瀑布蔽崖而下狀似垂蛭數百丈  
有濺珠亭觀前對靈溪觀中引瀑布縈繞廊院灌注  
池塘東一百五十步有柳泌使君宅號紫霄山居今  
皆蕪沒惟玉清行刻流水巖洪武間大水瀉出字多  
不辨又有隱真中峰梁徐則所居之處唐咸通中刺  
史姚鵠因建老君殿得玉簡刻曰海水竭台山闕皇  
家寶祚無休歇遂上之詔付史館宋大中祥符四年  
改福聖觀天聖五年遣中侍投金龍布衣孟合附詩  
以進重新之紹興十一年置九天僕射祠按衆真記

夷齊死爲九天僕射治天台山故崇道觀福聖觀俱有祠陳古靈襄皇佑間來遊瀑布命名習養有記嘉泰二年天台令丁大榮立碑刻習養之瀑四字於石崖上今廢

白雲昌壽觀 在崇道觀西唐大中六年建舊名白雲菴宋乾道四年內侍鄭守寧棄官入道乞改菴爲觀遂賜觀額鄭後於觀側自剏白雲菴今俱廢

玉京觀 在赤城玉京洞天之右宋政和八年賜額建觀未幾中亡嘉熙改元朝廷設醮祈禱遣使詣投龍簡並賜沉香真鐘磬及御書觀額拱辰殿扁安鎮觀

門

淨元觀 在東蒼峰今廢

金庭觀 在西桐柏山嵯縣東八十里唐裴通記云刻  
中山水之奇麗金庭洞天爲最其小香爐峰頂人莫  
能見晉王羲之家於此有書樓墨池遺蹟南齊道士  
褚伯玉建金庭觀卽羲之宅也

桃源觀 在新昌東茆山下去劉門山五里四面皆山  
一徑斜入桃花千樹松柏陰森雖夏無暑中有環松  
軒

院

聖壽院 在桐柏觀西舊名延壽周廣順元年朱霄外  
建菴址存焉宋治平三年改聖壽院今廢

妙樂院 在桐柏山卽王喬仙壇舊名仙壇院吳赤烏  
二年建殿前有石泉名醴泉泉南有上真亭去壇東  
二十步有八角井壇東有太子菴西有朝斗壇南去  
百步有吹簫臺北去三十步有瀛峰室故址猶存舊  
有銅鐘上刻唐景龍二年所鑄今廢

法輪院 在桐柏宮西吳赤烏元年葛元卓菴於此感  
三真人降授以貞一勸誡法輪妙經遂建臺曰降真  
漢乾佑中錢氏復爲朱霄外新之仍造檀香像一百

軀宋祥符元年改法輪院元至順間重脩翰林學士  
虞集記今廢

法蓮院 在瓊臺西十里唐咸通十三年道士葉藏質  
建以層巒疊出狀似蓮花故號蓮峰道院宋治平三  
年改額今廢

昭慶院 在桐柏宮前舊名佛窟唐大中六年建僧遺  
則卓菴之地唐會昌中廢後道士劉處靜創聖祖殿  
越州刺史李褒奏聞賜號道元張仁穎爲記宋祥符  
元年改額中有七星閣唐咸通中物也

鶴峰全真院 在天台縣東十五里元大德九年道士

徐光孚建今廢

桃源院 至元間道士陳貫道建今廢

臥雲菴 在瓊臺之側至元間道士周正中建今廢

祠廟

清風祠 祀伯夷叔齊道書稱二子爲九天僕射治桐

柏山舊桐柏觀有二大石像鑄製奇古內空外潤叩

之鏗然有聲或云宋王靈寶請之宮中或云宋有黃

道士善醫宣和天子召治太后疾愈賜之官與金帛

皆不受請二石像歸建九天僕射祠以居之

福聖觀  
舊亦有

九天僕射祠 後祠北縣令鍾紐復建顏曰清風祠今清風

祠又已久圯矣現在議詳重建舊有宋郡倅李彙撰  
九天僕射祠記紹興十一年姑蘇丁椿書今亡

老君殿 舊有天台居士鮑疑撰重脩老君殿記隆興  
二年松陽陳戒書今亡

善利廣濟真人祠 祀周王喬在瓊臺之左喬字子晉  
好吹簫作鳳鳴浮丘公接以上嵩高三十餘年求之  
不得後見於緱氏山乘白鶴而去道家稱右弼真人  
治桐柏山掌吳越水旱五代時封元弼真君後唐同  
光中夏亢陽不雨僧從禮焚香向仙祠祝曰上座要  
雨以滋枯瘁至夜卽雲起雨霏三日而止宋政和元



年封元應真人紹興庚申加封善利廣濟真人淳熙八年郡守唐仲友因旱詣禱獲應遂迎像至郡城之天慶觀祀之

劉阮廟 在雙闕下祀劉晨阮肇宋元祐二年建一在新昌之劉門山

豐饒坑廟 吳時有姜仙翁牧牛山谷中夏熟招雲覆之旱則呼雨多神異後坐化肉身不腐人以其真骨塑像旱潦有禱必應

應澤廟 神名江白郎唐長慶間縣令白餘豐祈雨靈應唐進士王展作記五代周顯德間封應澤明王宣

和二年重新之巖下有水隨潮往來後開廟見石龜

水遂竭

見圖經

惠澤廟 舊名惠濟在石梁之下其龍甚靈每遇歲旱致禱就曇花亭行禮從高俯瞰有乖肅敬宋嘉泰元年邑令丁大榮建竹真亭於潭側以爲祈禱之所是年五月旱禱有異龜出現甘雨均洽遂上其事賜龍君額曰惠澤祠四年忽潭水湧出金銀藏錢圓徑六寸文曰太平通寶實宋太宗賜以賚予道士自詢者也僧徒分攬則青蛇驅逐樵牧採取則墜石塞穴乃白丁縣命之還潭

靈澤孚濟廟 蒼山靈澤潭在東橫山之東三十里三  
潭列其下深廣瑩徹其龍故靈嘉泰元年禱雨見異  
龍遂得雨縣上於朝賜龍君額曰靈澤景定間旱禱  
輒應封靈澤孚濟侯 理宗封靈澤孚濟侯敕台州  
府天台縣靈澤侯蒼山之下聚而九淵鼓膚寸之雲  
而能濟一方者爾神龍之所宮乎鄉人有禱必應悉  
具靈蹟以聞宜加侯封以侈神貺可特封靈澤孚濟  
侯景定四年七月二十七日

尖山廟 沈仙翁不知何時人歲旱語人曰請我以瓜  
酒必雨果如其言子小仙翁靈異如父並塑像於尖

山廟

鄭公祠 祀宋天台令鄭至道元祐二年至道以雄州防禦推官知縣事爲政寬簡專務教化邑人悅服秩滿去任攀戀不忍其行因於關嶺畱家焉今其苗裔猶有存者居側有松關畱鄭坊並有鄭公祠

洪忠宣公祠 祀宋洪皓皓江右樂平人舉進士爲寧海簿攝縣事有善政宣和中賑濟秀州活九萬五千餘人呼爲洪佛子使金十五年執節不屈累遷徽猷閣直學士謚忠宣祠在寧海梁王寺前子造爲台州通判詩云生還未列麒麟畫舊德猶懷鸞鳳棲共聞

翰林今孰似凜然眉宇染塵緇